

NACRT

**ZAKON
O POLAGANJU PRAVOSUDNOG ISPITA
U BRČKO DISTRIKTU BIH**

Brčko, jul 2025. godine

Na temelju članka 22 Statuta Brčko distrikta Bosne i Hercegovine – pročišćeni tekst („Službeni glasnik Brčko distrikta Bosne i Hercegovine“, broj 2/10), Skupština Brčko distrikta Bosne i Hercegovine, na ____ redovnoj sjednici održanoj godine, usvaja

ZAKON
O POLAGANJU PRAVOSUDNOG ISPITA
U BRČKO DISTRIKTU BIH

Član 1.
(Predmet)

Ovim zakonom reguliše se polaganje pravosudnog ispita u Brčko distriktu Bosne i Hercegovine.

Član 2.
(Pojam)

Pravosudni ispit je stručni ispit koji polaže lice radi sticanja uslova za obavljanje poslova čije je vršenje uslovljeno pravosudnim ispitom (u daljem tekstu: ispit).

Član 3.
(Uslovi za polaganje ispita)

(1) Ispit može polagati lice koje je u okviru četverogodišnjeg studija na pravnom fakultetu steklo zvanje diplomiranog pravnika u Bosni i Hercegovini kao i u Socijalističkoj Federativnoj Republici Jugoslaviji do 6.4.1992. godine.

(2) Ispit može polagati i lice koje je završilo četverogodišnji studij na pravnom fakultetu u Bosni i Hercegovini, pod uslovom da je steklo najmanje 240 ECTS bodova i koje je tokom školovanja u nastavnom planu i programu imalo predmete iz oblasti navedene u članu 4. stav 4. ovog zakona.

(3) Ispit može polagati i lice koje je diplomu steklo na pravnom fakultetu u inostranstvu, uz dokaz o priznavanju strane diplome u Bosni i Hercegovini.

(4) Lice iz stavova 1, 2. i 3. može polagati ispit ako je, nakon sticanja odgovarajuće visokoškolske kvalifikacije, steklo radno iskustvo u struci u trajanju najmanje dvije godine na pravnim poslovima u sudu, tužilaštvu, pravobranilaštvu, advokatskoj ili notarskoj kancelariji, u organima uprave, privrednim društvima ili drugim pravnim licima u Bosni i Hercegovini.

(5) Pod uslovima iz stavova 1, 2, 3. i 4. ispit mogu polagati i pripravnici i volonteri.

Član 4.
(Način polaganja ispita)

- (1) Na ispitu se provjerava sposobnost kandidata za samostalno obavljanje poslova iz člana 2. ovog zakona.
- (2) Ispit se sastoji od pismenog i usmenog dijela.
- (3) Pismeni dio ispita polaže se iz krivično-pravne i građansko-pravne oblasti.
- (4) Usmeni dio ispita polaže se iz oblasti:
 - 1) Krivičnog prava (materijalno i procesno),
 - 2) Građanskog prava (materijalno i procesno),
 - 3) Privrednog prava,
 - 4) Upravnog prava i radnog prava,
 - 5) Ustavnog sistema, organizacije pravosuđa i konvencijskog prava.

Član 5.
(Program pravosudnog ispita)

- (1) Ispit se polaže prema Programu pravosudnog ispita (u daljnjem tekstu: Program) koji donosi Pravosudna komisija Brčko distrikta Bosne i Hercegovine (u daljnjem tekstu: Pravosudna komisija).
- (2) Program sadrži gradivo, pravne izvore sa nivoa države i Brčko distrikta Bosne i Hercegovine, okvirna pitanja i literaturu za svaku oblast iz člana 4. stav 4. ovog zakona.
- (3) Program se objavljuje u službenim glasnicima Bosne i Hercegovine i Brčko distrikta Bosne i Hercegovine kao i na internet stranici Pravosudne komisije.

Član 6.
(Komisija za polaganje pravosudnog ispita)

- (1) Ispit se polaže pred Komisijom za polaganje pravosudnog ispita (u daljem tekstu: Komisija) koja se sastoji od predsjednika i četiri člana sa liste ispitivača.
- (2) Listu ispitivača čine predsjednik Komisije, dva zamjenika i 12 ispitivača, koje rješenjem imenuje Pravosudna komisija na vrijeme od dvije godine iz reda diplomiranih pravnika sa položenim pravosudnim ispitom, koji su radom u pravosudnim organima ili advokaturi ili u organima uprave ili drugim institucijama ili drugim pravnim licima stekli visok ugled pravnog stručnjaka, kao i iz reda naučnika izabranih u akademsko zvanje docenta, vanrednog ili redovnog profesora na pravnim fakultetima u Bosni i Hercegovini, čija je naučna specijalizacija vezana za jednu ili više oblasti utvrđenih u članu 4. stav (4) ovog zakona.
- (3) Rješenjem o imenovanju određuje se ko je ispitivač za pojedinu oblast.

(4) Predsjednik Komisije ili njegovi zamjenici određuju sastav Komisije za polaganje ispita za pojedinog kandidata ili za određeno vrijeme, ali ne duže od tri mjeseca.

(5) Administrativno-tehničke poslove Komisije obavlja sekretar ili njegov zamjenik koji se imenuju iz reda diplomiranih pravnika zaposlenih u Stručnoj službi Pravosudne komisije (u daljem tekstu: stručna služba).

Član 7.
(Izvještaj o radu Komisije)

Komisija o svom radu podnosi izvještaj Pravosudnoj komisiji najmanje jednom godišnje.

Član 8.
(Prijava za polaganje pravosudnog ispita)

(1) Prijavu za polaganje pravosudnog ispita lice iz člana 3. ovog zakona (u daljem tekstu: kandidat) podnosi stručnoj službi.

(2) Uz prijavu kandidat podnosi i dokaze da ispunjava uslove iz člana 3. ovog zakona.

Član 9.
(Rješenje o ispunjenosti uslova za polaganje ispita)

(1) Predsjednik Komisije rješenjem utvrđuje da li kandidat ispunjava uslove za polaganje ispita.

(2) Protiv rješenja predsjednika Komisije kojim se utvrđuje da kandidat iz stava (1) ne ispunjava uslove za polaganje ispita, može se izjaviti žalba Pravosudnoj komisiji u roku od 15 dana od dana prijema rješenja.

(3) Pravosudna komisija u postupku odlučivanja po žalbi istu može odbiti ili uvažiti i utvrditi da kandidat ispunjava uslove za polaganje ispita.

(4) Protiv rješenja Pravosudne komisije kojim se žalba odbija može se pokrenuti upravni spor kod Osnovnog suda Brčko distrikta Bosne i Hercegovine (u daljem tekstu: Osnovni sud).

Član 10.
(Mjesto i termin polaganja ispita)

(1) Na osnovu rješenja kojim je kandidatu utvrđeno da ispunjava uslove za polaganje ispita, predsjednik Komisije određuje mjesto i termin kada će kandidat polagati ispit.

(2) Kandidat dobija obavještenje o mjestu i terminu polaganja ispita najkasnije 15 dana prije održavanja zajedno sa pozivom za plaćanje troškova polaganja istog.

(3) Odluku o visini troškova polaganja ispita donosi Pravosudna komisija i isti predstavljaju prihod Budžeta Brčko distrikta Bosne i Hercegovine.

Član 11. (Pismeni dio ispita)

(1) Ispit počinje izradom pismenog zadatka iz krivično-pravne i građansko-pravne oblasti.

(2) Prije početka izrade pismenog zadatka sekretar Komisije utvrđuje identitet kandidata.

(3) Zadatak za pismeni dio ispita daje Komisija na prijedlog člana koji je ispitivač za predmet iz koga kandidat polaže pismeni dio ispita.

(4) Kandidat ima pravo na šest sati rada za izradu pismenog zadatka za svaku oblast pojedinačno.

(5) Pismenom dijelu ispita koji nije javan mogu prisustvovati predsjednik i članovi Komisije kao i sekretar Komisije ili njegov zamjenik koji nadgledaju polaganje ispita.

(6) Za vrijeme izrade pismenog zadatka kandidat može koristiti samo tekstove propisa i računar.

Član 12. (Ocjena uspjeha pismenog dijela ispita)

(1) Odluku o ocjeni uspjeha pismenog dijela ispita donosi Komisija većinom glasova po prethodno pribavljenom mišljenju ispitivača odgovarajuće oblasti.

(2) Pismeni rad ocjenjuje se ocjenom „položio“ ili „nije položio“.

(3) Kandidat koji ne položi pismeni dio ispita ni iz krivično-pravne ni iz građansko-pravne oblasti ne može pristupiti polaganju usmenog dijela ispita i smatra se da ispit nije položio.

Član 13 (Usmeni dio ispita)

(1) Kandidat koji položi pismeni dio ispita iz krivično-pravne i građansko-pravne oblasti ili samo iz jedne od njih pristupa polaganju usmenog dijela ispita.

(2) Na usmenom dijelu ispita kandidat ne može polagati ispit iz oblasti iz koje nije položio pismeni dio ispita.

(3) Usmeni dio ispita je javan.

Član 14

(Ocjena konačnog uspjeha na ispitu)

(1) Konačni uspjeh na ispitu ocjenjuje se prema rezultatu koji je kandidat pokazao na pismenom i usmenom dijelu ispitu ocjenom „položio“ ili „nije položio“.

(2) O ocjeni uspjeha kandidata Komisija odlučuje većinom glasova vodeći računa o mišljenju ispitivača odgovarajuće oblasti.

(3) Ocjena o uspješnosti ispita saopštava se kandidatu po završenom ispitu.

Član 15

(Popravni ispit)

(1) Kandidat koji na ispitu ne pokaže zadovoljavajuće znanje iz najviše dvije oblasti ima pravo polagati popravni ispit iz tih oblasti (u daljem tekstu: popravni ispit).

(2) Rok za polaganje popravnog ispita iz jedne oblasti ne može biti kraći od jednog ni duži od tri mjeseca, a rok za polaganje popravnog ispita iz dvije oblasti ne može biti kraći od dva ni duži od četiri mjeseca.

(3) Ako kandidat ne položi samo usmeni dio ispita iz oblasti iz koje se polaže i pismeni dio ispita, a taj dio ispita je položio, na popravnom ispitu nije dužan ponovo polagati pismeni dio ispita iz te oblasti.

(4) Ako kandidat u roku iz stava 2. ovog člana ne položi popravni ispit, smatraće se da ispit nije položio.

Član 16

(Uvjerenje o položenom pravosudnom ispitu)

Kandidatu koji je položio ispit Pravosudna komisija izdaje uvjerenje o položenom pravosudnom ispitu koje potpisuje predsjednik Pravosudne komisije.

Član 17

(Odgađanje i odlaganje ispita)

(1) Na zahtjev kandidata predsjednik Komisije može odgoditi polaganje zakazanog ispita ako je kandidat iz opravdanih razloga spriječen da polaže ispit.

(2) Na zahtjev kandidata predsjednik Komisije može odložiti započeti ispit ako je kandidat iz opravdanih razloga spriječen da nastavi polaganje ispita.

(3) Protiv rješenja predsjednika Komisije kojim se odbija zahtjev iz stavova (1) i (2), kandidat može podnijeti žalbu Pravosudnoj komisiji u roku od 15 dana od dana prijema rješenja.

(4) Pravosudna komisija u postupku odlučivanja po žalbi istu može odbiti ili uvažiti i odobriti zahtjev iz stavova (1) i (2).

(5) Odlukom kojom se zahtjev iz stavova (1) i (2) odobrava kandidatu se u pravilu određuje novi termin polaganja ispita.

Član 18

(Nepristupanje i odustanak od ispita)

(1) Ako kandidat ne pristupi polaganju ispita ili prije početka polaganja izjavi da odustaje od ispita, smatraće se da ispit nije polagao.

(2) U slučaju iz prethodnog stava kandidat može pristupiti polaganju ispita po isteku roka od 3 mjeseca od prethodno zakazanog termina ispita.

(3) Ako kandidat odustane od već započetog usmenog ispita ili ne preda radove iz pismenog dijela ispita, smatraće se da ispit nije položio.

(4) Na polaganje popravnog ispita shodno se primjenjuju i stavovi (1), (2) i (3).

Član 19

(Ponovo polaganje ispita)

Kandidat koji nije položio ispit može ga ponovo polagati po isteku roka od šest mjeseci računajući od dana prethodnog polaganja.

Član 20

(Naknada za rad Komisije)

Članovi Komisije i sekretar imaju pravo na naknadu za rad u skladu sa Pravilnikom koji donosi Pravosudna komisija.

Član 21
(Izjednačavanje pravosudnog ispita)

Sa ispitom, u smislu ovog zakona, izjednačavaju se pravosudni ispiti položeni po propisima koji su na snazi na teritoriji Bosne i Hercegovine, kao i pravosudni ispiti položeni u bivšoj SFRJ do 6. aprila 1992. godine.

Član 22
(Pravilnik o polaganju pravosudnog ispita)

Pravilnik o polaganju pravosudnog ispita, kojim će se bliže propisati način prijavljivanja i tok ispita, rad Komisije, oblik i sadržaj uvjerenja o položenom pravosudnom ispitu i vođenje evidencije lica koja su položila pravosudni ispit, donosi Pravosudna komisija.

Član 23
(Donošenje podzakonskih propisa)

Pravosudna komisija će u roku od 60 dana od dana stupanja na snagu ovog zakona donijeti podzakonske akte predviđene ovim zakonom.

Član 24.
(Shodna primjena)

Na pitanja postupka koja nisu uređena ovim zakonom primjenjuju se odredbe Zakona o upravnom postupku Brčko distrikta Bosne i Hercegovine.

Član 25.
(Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku Brčko distrikta Bosne i Hercegovine“.

Broj:
Brčko,

PREDSJEDNIK
SKUPŠTINE BRČKO DISTRIKTA
BOSNE I HERCEGOVINE

Damir Bulčević

